



„Savez poljoprivrednih udruženja Konjic“
Varda bb, 88400 Konjic

Telefon: 036 735-040 i 036 735-041, fax 036 735-041
www.poljoprivredakonjic.ba



7. MEĐUNARODNI FESTIVAL HRANE “KONJIC FOOD-FEST” 2016.



U organizaciji općine Konjic, Saveza poljoprivrednih udruženja Konjic, Turističke zajednice HNK, Podružnica Konjic- Jablanica, Centra za neformalnu edukaciju u kulinarstvu i ugostiteljstvu Gastroid, Firma ToFi d.o.o. iz Sarajeva i Agencije Prvi Korak, dana 05. i 06. oktobra 2016 godine na Sportsko-kulturnom centru "Partizanovo" u Konjicu održan je 7. Međunarodni festival hrane "KONJIC FOOD-FEST" 2016.

Dan uoči Festivala (04 10 2016 godine) završene su sve tehničke pripreme za realizaciju manifestacije, (dovoženje i postavljanje stolova, stolica, bine) a uradili su ih radnici JKP Standard iz Konjica i članovi Stručne službe Saveza poljoprivrednih udruženja Konjic.



Priprema izlagačkih mjesta i izlaganje proizvoda uz pomoć učenika Srednje poljoprivredne škole iz Konjica počelo je u ranim jutarnjim satima prvog dana Festivala.



Organizatorima Festivala, u njegovoj realizaciji značajno su pomogli vrijedni učenici Srednje poljoprivredne škole iz Konjica koji su bili na raspolaganju organizatorima i učesnicima Festivala oba dana festival i koji nisu žalili truda da prisutnima na festival pomognu na razne načine..



Svečano otvaranje Festivala zakazano za 11:00 sati, do kada su sve pripreme završene.



Na ovogodišnjem Festivalu učestvovalo je 86 izlagača, od kojih su polovina bili domaći, a druga polovina bili su izlagači sa strane, iz: Sarajeva, Tuzle, Jablanice, Viteza, Olova, Visokog, Prozora, Gradačca, Fojnice, Travnika, Gračanice i oni koje s posebnim ponosom ističemo, naši dugogodišnji prijatelji iz Norveške- komune Sund.

Neki izlagači izlagali su samostalno, a neki sa svojim udruženjima i organizacijama.





Ove godine organizator je dozvolio učešće i nekim izlagačima koji se ne uklapaju u Festival hrane, ali su svojim proizvodima uljepšali i proširili asortiman ponuđenih proizvoda i kupcima omogućili kupovinu rijetko viđenih proizvoda.



Prije zvaničnog otvorenja Festivala, posjetioci su obilazili štandove sa ponuđenom robom, divili se asortimanu ponuđenih proizvoda i neke proizvode odmah kupovali jer su znali da će brzo biti rasprodani. Sav sadržaj ponuđenih proizvoda, od kojih je jedan broj pravljen na licu mjesta, potencijalni kupci su prije kupovine mogli probati.



I ove, kao i predhodne godine posebnu draž Festivalu dalo je učešće Centra za neformalnu edukaciju u kulinarstvu i ugostiteljstvu GastroID i Firma "ToFi" d.o.o, koji su sa učenicima Srednje Turističko – ugostiteljske stručne škole iz Konjica i gostima iz Sund Komune iz Norveške pripremali specijalitete od domaće jagnjetine i ribe pastrmke iz Konjičkog ribnjaka.



Po programu festivala, u 11:00 sati počeo je svečani dio – ceremonija otvaranja Festivala. Voditeljica programa gospođa Biljana Handžo pozdravila je prisutne, zaželela im je dobrodošlicu i pozvala prve učesnike programa, djecu iz dječijeg obdaništa "Zulejha Begeta" iz Konjica, koje su prisutni na Festivalu podržali velikim aplauzom.



Nakon prvog dijela kulturno - zabavnog programa, uslijedilo je obraćanje zvaničnika.

Prvi se prisutnima obratio predsjednik Saveza poljoprivrednih udruženja Konjic, gospodin Nusret Avdiebgović, a zatim je prisutne pozdravio predstavnik Sound komune iz Norveške, koji su već niz godina potvrđeni prijatelji općine Konjic, gospodin Ivar Steinsland



U ime općine Konjic, izlagače, posjetoce i goste pozdravio je načelnik općine Konjic gospodin Emir Bubalo, kome je predsjednik Organizacionog odbora Festivala gospodin Ivan Karlović uručio zahvalnicu za doprinos organizaciji Festivala. Od prvog Festivala 2010 godine, do danas gospodin Bubalo je maksimalno podržavao organizaciju i realizaciju Festivala.

Na kraju se prisutnima obratio gospodin Donko Jović, ministar Ministarstva poljoprivrede, šumarstva i vodoprivrede HNK, koji je pohvalio organizaciju Festivala i obećao podršku organizaciji ovaakvih i sličnih manifestacija i koji je otvorio ovogodišnji Festivala "Konjic Food Fest 2016"



Po programu Festivala u okviru ceremonije otvaranja Festivala upriličena je dodjela zahvalnica institucijama i pojedincima, koji su dali doprinos organizaciji Festivala

Zahvalnice je uručio načelnik općine Konjic gospodin Emir Bubalo, a zahvalnice su pored gospodina Emira Bubala dodijeljene:

Institucijama:

- JKP "STANDARD" Konjic;
- JU "Srednja škola Konjic" Konjic;
- JU Dječije obdanište "Zulejha Begeta" Konjic;
- JU Radio Konjic;
- JU Radio televizija Jablanica.



Pojedincima:

- Donko Jović, ministar Ministarstva poljoprivrede, šumarstva, i vodoprivrede HNK;
- Ajdin Teletović, ministar Ministarstva trgovine, turizma i zaštite okoline HNK;
- Gunnar Nagell Dahl
- Ivan Karlović, predsjednik Organizacionog odbora Festivala;
- Vahud Alibegović, direktor Organizacionog odbora Festivala



Nakon što je 7. Međunarodni festival hrane "KONJIC FOOD-FEST" 2016. otvoren, veliki broj posjetilaca, učesnika i gostiju na Festivalu uživao je u kulturno-zabavnom programu, koji su upriličili članovi KUD-a "Preporod" iz Konjica.



Organizacioni odbor Festivala cijeni da je ovo do sada najuspješnije organizovani festival i po broju učesnika, asortimanu ponuđenih proizvoda, broju posjetilaca, a posebno velikom broju uglednih gostiju.



Na 7. Festivalu hrane "Konjic Food Fest" 05. i 06. oktobra 2016. godine kupcima je nuđeno:
- **mlijeko i mliječni proizvodi:** Repovačkog sira, sir iz mjeha, dimljeni sir, fojnički, vlašički i travnički sir.



- **Širok asortiman suhomesnatih proizvoda** Izeta Baltića iz Sarajeva i „BEG PROM” iz Visokog, obogatili su festival, a o njihovom kvalitetu i ozbiljnosti rada govorili su kupci njihovih proizvoda.



- **Voće:** Iako ove godine, na području općine Konjic voće: jabuka, kruška, šljiva, orah, kesten, nije bilo najboljeg roda, proizvođači su se potrudili da na stolovima bude dovoljno i voća i **prerađevine od voća:** džem od maline, smokve, slatko od maline, pekmez od kupine i smokve, sokovi od jabuke, zove, maline, kupine i od ruže đulbešećerke, suho voće.



- **Povrće i prerađevine od povrća** zauzeli su posebno mjesto kako po obimu tako i po kvalitetu. Bilo čega da ste se sjetili i osjetili potrebu da s tim obogatite svoju zimnicu mogli ste naći na stolovima proizvođača povrća. Za one koji nisu stigli detaljno pregledati ponudu spomenut ćemo samo neke proizvode, koji su bili na stolovima vrijednih proizvođača povrća i koji su posebno odabrani za ovu priliku, i to: paradajz, luk, krumpir, grah, paprika, mrkva, kupus, cvekla, patlidžan, tikva, kukuruz, zatim, na zadovoljstvo mnogih domaćica, prerađevina od povrća kao što je ajvar i kiselo povrće čime je zimnica bila upotpunjena.



Ova godina je za konjičke pčelare, kao i za pčelare širom Bosne i Hercegovine, bila jedna od lošijih godina po prinosima, ali oni pčelari, koji su pčelama posvetili dovoljnu pažnju, i bili uporni u traženju pčelinjih paša, nisu nezadovoljni. Nešto meda je ostalo i od prošle godine, koja je po prinosima bila izuzetno dobra godina. A da su Konjički **pčelari** vrhunski u svom radu potvrđuje njihovo stalno učešće na sajmovima i festivalima širom Bosne i Hercegovine, kao i na ovom Festivalu gdje su bili zastupljeni u značajnom broju. Na prepunim stolovima pčelara bilo je različitih vrsta meda: bagremov, med od vriesaka, livadski, kadulja, kestenov i šumski med, te proizvodi od meda ili na bazi meda: matična mliječ, propolis, vosak i polen te razni preparati na bazi meda i raznih ljekovitih biljnih vrsta.





Sakupljači, prerađivači i proizvođači **ljekovitog bilja** članova UG "Brusnica" iz Konjica, kao i učesnici manifestacije iz svih krajeva Bosne i Hercegovine su pokazali s kakvim sve vrstama čajeva i ostalih prerađevina od ljekovitih biljnih vrsta raspolaže općina Konjic i Bosna i Hercegovina.



Cilj festivala je podrška domaćoj proizvodnji, posebno onoj koja se proizvodi na organski način. Cilj je ostvaren jer je festival bio pun organskih proizvoda.



Zamisao Organizatora je bila da izlagači donesu hranu koja je napravljena po tradicionalnoj, domaćoj recepturi, ili da je prave na licu mjesta. Svake godine se sve veći broj učesnika odlučuje odgovoriti na postavljeni zadatak i donijeti ili praviti na licu mjesta nešto slično, i nisu se pokajali, jer je sve što je za ovu priliku pripremljeno, prodato u prvim satima festivala.



U okviru gastro ponude Učesnicima Festivala su svoje kulinarske kvalitete pokazali predstavnici Centra za neformalnu edukaciju u kulinarstvu i ugostiteljstvu GastroID i Firma "ToFi" d.o.o, koji su sa gostima iz Norveške i sa učenicima Srednje Turističko – ugostiteljske stručne škole iz Konjica pripremali specijalitete od ribe pastrmke i jagnjetine, a koje su pored gostiju nudili i posjetiocima Festivala.



Po programu Festivala organizovana je edukacija za poljoprivredne proizvođače na temu "Proizvodnja u plastenicima" koju je u Sali Općine Konjic održao Dr. Omer Kurtović direktor Federalnog zavoda za poljoprivredu iz Sarajeva.



U oba dana festivala organizovana je "**Čajanka**", koju su pripremili članovi Saveza poljoprivrednih udruženja Konjic i OPZ Konjic. Čaj je je pripremljen od ljekovitih trava ubranih na čistim, često veoma nepristupačnim područjima općine Konjic, zaslađen s domaćim medom, a učenici Srednje poljoprivredne

Škole iz Konjica, su pomogli realizaciju čajanke, djeleći čaj učesnicima i gostima Festivala.



Jedna od atrakcija Festivala bili su prženi kesteni, koji su privukli pažnju posjetilaca.



Organizator je i ove godine organizovao takmičarski dio Festivala. Komisija formirana od predstavnika Općine Konjic, Saveza poljoprivrednih udruženja Konjic, Opće poljoprivredne zadruge Konjic, Agencije Prvi korak i Turističke zajednice HNK – Podružnica Konjic i Jablanica, birala je najuređenije izlagačko mjesto. Nakon što je komisija obišla 86 izlagačkih mjesta, proglasila je pobjednike 7. Međunarodnog festivala hrane "KONJIC FOOD-FEST" 2016.

Predsjednik Organizacionog odbora Festivala i predsjednik Općinskog vijeća Konjic, gospodin Ivan Karlović, uručio je diplome i novčane nagrade pobjednicima, a to su:

1. mjesto JU „Srednja škola” Konjic, Turističko - ugostiteljska stručna škola;
2. mjesto Udruženje građana „Izvor Škahovica” Gračanica
3. mjesto Dječiji vrtić „Zulejha Begeta” Konjic



Organizator je na osnovu realizacije planiranog programa Festivala, utisaka i zapažanja gostiju, izjava izlagača, koji su više nego zadovoljni učešćem na Festivalu, te komentara posjetilaca, koji su iznenađeni raznolikom ponudom, ocjenio da je Festival dobro organizovan, sa zaključkom da se uočene sitne greške otklone na narednim Festivalima, s nadom da će i ugostiteljske i turističke organizacije s područja općine Konjic, kao i sve veći broj građana prepoznati i podržati pozitivnu stranu festivala, i isti iskoristiti za vlastitu reklamu i reklamu općine Konjic.

Da je Festival uspio i da zaslužuje visoku ocjenu govore i osmijesi na licima učenika Srednje poljoprivredne škole iz Konjica, koji su, nakon napornog rada dva dana Festivala, Festival ispratili sa osmijesima.



U ime organizatora i pokrovitelja festivala, hvala svim učesnicima, posjetiocima i gostima, sretno do oktobra 2017. godine, kada vas očekujemo na 8.Međunarodnom festivalu hrane "KONJIC FOOD-FEST 2017".